



Univerzitet u Sarajevu – Institut za historiju  
Podgaj 6, 71000 Sarajevo  
Tel: +387 33 209 364, Fax: +387 33 217 263  
[www.iis.unsa.ba](http://www.iis.unsa.ba)  
e-mail: [nauka@bih.net.ba](mailto:nauka@bih.net.ba)

---

POZIV ZA SUDJELOVANJE NA NAUČNOJ KONFERENCIJI

**„Prijelomne godine bosanskohercegovačke prošlosti“**

koja će biti održana

**22. i 23. novembra 2019. godine u Sarajevu**

U povodu obilježavanja 60. godišnjice osnivanja i rada Institut za historiju Univerziteta u Sarajevu organizira naučnu konferenciju pod naslovom **„Prijelomne godine bosanskohercegovačke prošlosti“**.

Na vremenskoj liniji bosanskohercegovačke prošlosti moguće je identificirati tačke velikih društvenih događaja koji se zbog obima nastalih promjena mogu smatrati prijelomnim. Te prijelomne tačke obično se dovode u vezu sa konkretnim godinama ili događajima koji danas predstavljaju međaše u bosanskohercegovačkoj historiografiji. Najveći među njima jasno odvajaju velike epohe bosanskohercegovačke prošlosti – srednjovjekovnu od osmanske, osmansku od austrougarske, austrougarsku od jugoslavenske i jugoslavensku od epohe nezavisne države Bosne i Hercegovine. Međutim, i unutar spomenutih i već ustaljenih periodizacijskih cjelina mnoštvo je godina i događaja koji mogu imati karakter prijelomnih.

Težište ove konferencije nije na krupnim pitanjima, elaboriranim već više puta u historiografiji, već na dugotrajnim procesima koji su prethodili ili bili posljedica određenih prekretnica u bosanskohercegovačkoj historiji. Ovim prilikom namjera nam je potaknuti inventivnost u nastojanju da se u istraživanju prijelomnih godina bosanskohercegovačke prošlosti ponude drugačiji i svježiji istraživački pristupi. S tim ciljem Vas pozivamo da

uzmete učešće u radu Naučne konferencije „**Prijelomne godine bosanskohercegovačke prošlosti**“ i ponudite izlaganja koja će u vremenskom intervalu od srednjeg vijeka do savremenog doba promatrati:

- najznačajnije godine kao prijelomne tačke bosanskohercegovačke historije,
- društvene, političke, privredne i kulturne pojave i procese koji zbog velikih prekretnica (u prijelomnim godinama i kasnije) dovode do transformacija unutar bosanskohercegovačkog društva,
- prijelomne godine u historiografiji o Bosni i Hercegovini i ulogu Instituta za historiju u njihovom proučavanju.

Na ovaj način želimo potaknuti na razgovor o događajima i procesima koji su ostavili dubok trag u bosanskohercegovačkoj prošlosti i presudno utjecali na njezin tok, te omogućiti prezentaciju naučnih istraživanja u vezi s tim, odnosno ponuditi historiografsku elaboraciju događaja i procesa u prijelomnim godinama bosanskohercegovačke prošlosti.

Službeni jezici konferencije su bosanski i engleski.

Vaše prijave možete dostaviti na priloženom obrascu najkasnije **do 1. marta 2019.** godine na adresu **institut60@iis.unsa.ba**. Obavještenje o prihvatanju prijave bit će dostavljeno aplikantima najkasnije do 31. marta 2019. godine.

Sarajevo, 3. decembar 2018.

Organizacioni odbor